

147
148
1741

TRISTES EXEQUIAS
QVAS
PRÆ-NOB. CLARISS. DOCTISS.
DOMINUS

PETRUS
ZORNIUS,

GYMNASII THORUNIENSIS RECTOR
FAMIGERATISSIMUS,
FILIO UNICO ET CARISSIMO

ADRIANO PHILIPPO


MORBILLIS INFELICITER EXTINGTO,

d. 2. Aug. A. R. S. M. DCC. XLI.

SOLENNITER INSTITUIT,

SIMPLICE ELEGIDIO COMITARI
SUMMAMQUE OBSERVANTIAM CONTESTARI
VOLUIT

HELICON THORUNENSIS.



T H O R U N I I

Impressit Johann | Nicolai NOBIL, SENAT. & GYMN. Typographus.

12

ERgo iterum blandi marcescunt veris honores.
Non rosa, non violæ, non hyacinthus adest,
Iam nec prata virent vario depicta colore,
Nec gemmas arbor vel pia vitis agit,
Iam silet omnis aër, quando prædulcis aëdon
Occlusit vocem, nec sua fata canit.
Gramina quid mirum falci succumbere acutæ,
Pictaque sole suo crescere poma simul.
Nunc etenim regnat præfervida stella Leonis,
Iungitur huic rapidi stella maligna Canis.
Hinc caput alma Ceres gravibus præcingit aristis,
Munera ruricolis messis opima parat.
Morborum hinc genus omne volat, perimitque repente
Corpora, securos & Libitina rapit.
Heu mihi, Libra dies quam mox æqualibus horis
Dividet, & Phoebum longior umbra teget!
Tum Pomona suos fructus decerpit, Iacchus
Flenis spumabit Massica vina cadis,
Quod nisi bruma nives gelidas adspargeret orbi,
Hinc etiam posset lætior ire dies:
Frigore Pieridas nunquam torpere molesto
Esset opus, magis mens ingeniosa foret,
O curvas hominum mentes! quis ponere leges
Præsumat superis, vel variare gradus?
Naturæ sic jura jubent, sic omnia fati
Subiecta, & numero stantque caduntque suo.
Nempe ut condiscant homines, nihil esse perenne
Rebus in humanis, nil stabile esse diu.
Si cui cymba volat ventis subvecta secundis,
Mox tumido vasa est æquore quassa rapi:

Si quibus

Si quibus arca gemit millenis plena talentis,
Frumentique strues horrea lata premunt:
Quam subito in turpes cineres hæc flamma resolvit,
Factus & est parvo tempore nudus opum.
Regales etiam patiuntur funera turres,
Et manet everfis non nisi fama super.
Secula viderunt regum diademata terræ
Affligi, & Nemesis frangere sceptræ solet.
Scilicet immotum nihil est, semperque rotatur
Ordine, quod mundi machina magna tenet.
Adspicit hæc sapiens, animumque obfirmat in omnes
Casus, semper ei fata superna placent:
Innixusque DEO, pelagi immerfabilis undis
Enatat, intrepidum magna ruina ferit.
Hæc TE adeo spectant, RECTOR venerande Lycci,
Quem modo post Viadrum Vistula lata fovet,
Sorte Tua felix fueras, quum grande Sedinum
Ornasti ingenio Thespiadumque chorum.
Mutare has sedes, aliosque subire penates
TE fatum arcanum jussit, ut auxilium
Aonioque gregi ferres, famamque parares
Amplius, hæc olim Jam stabilita fuit.
Huc transportasti felici sidere NATUM,
Vivida qui docti Patris imago fuit;
Delicium Marris svavis, spes certa decusque,
Et patrii pariter firma columna laris.
Ac veluti navis, tubiis quam fluctibus errat,
Non metuit Borean, sed quasi fixa sedet;
Non etenim spissis avellitur ancora arenis,
Huic innixa ratis, totaque nixa salus:

Sic

177
Sic ADRIANUS erat vitæ prænobile fulcrum,
Famæ heres, gentis furculus unus erat.
Ille senectutis columen nam debuit esse,
Ad quem transfiret nomen & omne decus.
O spes fallaces hominum! dum tertia lustra
molitur, subito flosculus ille periit.
Flosculus in mediis succiditur auctibus, atri
Morbilli immeritum nempe dedere neci:
Iamque peregrino tumulum sub cespite functus
Repperit, hinc lætum jussus adire polum.
Hinc dolor, hinc lacrimæ, luctus, suspiria, vota
Sollicitant animos, ac sine fine premunt.
Sed bene fit: DEUS ipse vocat: qui rite Tonantem
Consequitur, luctus grande levamen habet.
Nil homini proprium superi tribuere, nec ipsa
Arbitrii nostri (credite) vita cluet.
Quærere fas aliam patriam est, ipsa optima tellus
Exilium est, vere est hic lacrimosa dies.
Iam quæ jure suo repetunt pia numina, nosmet
Quando vocant, lætos cedere nonne decet?
Sed quis doctorem doceat moneatque magistrum?
Zornius excellens his meliora tenet.
Nos nostri officii memores, hæc paucula tristes
Scribimus Hadriano, sic quia fata jubent:
Flosculus ereptus terris, translatus in hortum
Sidereum crescit, perfruiturque DEO.

os)(o)(so